



Komunikadu Impresa

3 Outubru 2017

Distritu Dili

Komunidade Aldeia Dar-Lau, Suku Becora primeira-vez asesu ba informasaun kona-ba direitu labarik no asesu ba justisa formal

Iha 29 Setembru 2017, Judicial System Monitoring Programme (JSMP), fasilita treinamentu ba komunidade sira iha Aldeia Dar-Lau, Sub-distritu Nain-feto, Munisipiu Dili.

Treinamentu ne'e partisipa hosi ema nain 21 ne'ebé kompostu hosi komunidade feto 11 no mane 12. Treinamentu ne'e ho abjetivu atu hasae kuñesementu komunidade sira kona-ba direitu labarik no oinsa atu asesu ba justisa formal.

Materia ne'ebé apresenta iha treinamentu ne'e mak hanesan, saida mak direitu labarik, se de'it mak iha obrigasaun atu proteze labarik, protesaun labarik tuir lei aplikável sira inklui lei internasional relavante hanesan Konvensaun ba Direitu Labarik, no tipu krime sira ne'ebé akontese hasoru labarik. Aleinde ne'e, JSMP mós intodus knaar Juis, Prokuradór, Defensória Públiku, Advogadu Privadu no Polísia iha âmbitu prosesu justisa formál nian.

“ Iha area rurais barak maka to'o agora seidauk asesu ba informasaun legal nesesariu no importante sira hanesan ne'e, inklui suku no aldeia ne'ebé besik iha Dili maibé komunidade sira ne'e kontinua enfrenta dezafiu hanesan atu asesu ba informasaun no treinamentu ne'e nu'udar forma ida atu hatan ba situasaun hirak ne'e,” dehan Luis de Oliveira Sampaio, Diretor Executivo JSMP.

Atividade divulgasaun sira hanesan ne'e importante teb-tebes tanba bele hasae lideransa komunitária sira nia koñesementu nune'e sira bele iha koñesimentu ne'ebé suficiente kona-ba direitu labarik, nomós iha tempu hanesan atu enkoraza komunidade sira atu hapara violénsia hasoru labarik.

Xefe Aldeia Dar-Lau Sr. Santiago Maria Lobato, iha sesaun abertura apresia ho JSMP nia inisiativa ba programa ne'e tanba bele fasilita ona treinamentu ba autóridade lokál inklui inan aman no lia-nain sira, nune'e bele hasae sira ninia kuñesimentu no hatene klean kona-ba lideransa komunitáriu sira ninia obrigasaun atu proteze labarik sira ne'ebé afeita hosi krime no bele rezolve problema tuir dalam justisa formal.

JSMP observa katak partisipante sira ativu tebes iha treinamnetu ne'e, tanba foin primeria-vez partisipa treinamentu kona-ba labarik ninia direitu no oinsa atu asesu ba justisa formal. Partisipantes sira mós rekomenda ba JSMP atu kontinua habelar informasaun ba komunidade sira ne'ebé seidauk hetan oportunidade atu partisipa iha treinamentu hanesan.

Aliende ne'e sira mós hato'o sira nia preokupasaun no pergunta kona-ba krime ne'ebé hasoru labarik no oinsa sira atu rezolve tuir sistema formal. Liuliu, partisipantes sira mós kestiona kona-ba ema boot sira ne'ebé gosta envolve labarik sira atu halo krime.

JSMP hein katak ho atividade treinamentu ne'e, bele kontinua hametin diak liu tan koñesimentu komunidade iha área rural sira, no liu-liu atu fasilita sira kona-ba opsaun oinsa atu trata kazu sira ne'ebé akontese hasoru labarik.

Tuir planu treinamentu hanesan sei halao fali iha distritu Aileu no treinamentu ne'e hetan apoiu hosi Norwegia-Hivos hosi Jakarta, Indonesia.

Atu hetan informasaun liutan bele kontaktu ba:

Luis de Oliveira Sampaio
Diretor Executivo JSMP
E-mail: luis@jsmp.tl